



## SIARAN MEDIA KEMENTERIAN KEWANGAN MALAYSIA

**HAD PARAS HARGA RUNCIT PRODUK PETROL RON95 DIKURANGKAN DARIPADA RM2.20 KEPADA RM2.08**



Kementerian Kewangan Malaysia



**HAD PARAS HARGA RUNCIT  
PRODUK PETROL **RON95**  
DIKURANGKAN DARIPADA  
RM2.20 KEPADA **RM2.08****

*Ini lah komitmen kerajaan **PAKATAN HARAPAN**  
untuk mengurangkan **KOS SARA HIDUP RAKYAT**.*

Pada bulan Januari 2019, Kerajaan Persekutuan melaksanakan penetapan harga runcit produk petroleum secara mingguan bagi membolehkan pengguna menikmati sebarang perubahan harga dengan lebih cepat selaras dengan penurunan harga petroleum di pasaran dunia. Demi melindungi pengguna daripada kesan kenaikan harga yang ketara apabila harga minyak dunia meningkat, harga runcit produk petroleum dihadkan pada harga RM2.20 seliter bagi petrol RON95 melalui pemberian subsidi.

Melalui kaedah mingguan ini, harga runcit produk petroleum akan diturunkan apabila harga minyak dunia turun tetapi apabila harga minyak dunia naik, kenaikan harga runcit produk petroleum akan dihadkan pada RM2.20 bagi produk petrol RON95 dan RM2.18 bagi diesel. Ini adalah suatu inisiatif baharu oleh Kerajaan Persekutuan Pakatan Harapan demi melindungi kepentingan golongan B40, yang tidak pernah diamalkan oleh Kerajaan terdahulu. Had harga minyak ini akan dibatalkan apabila subsidi minyak bersasar dilaksanakan pada pertengahan tahun ini.

Berdasarkan trend harga sebenar pasaran produk petroleum yang semakin meningkat pada masa ini, Mesyuarat Jemaah Menteri pada 27 Februari 2019 telah bersetuju supaya had pengekal harga runcit petrol RON95 yang pada masa ini ditetapkan pada paras RM2.20 seliter dikurangkan kepada RM2.08 seliter. Ini bermakna harga runcit RON95 akan dihadkan kepada RM2.08 seliter sungguhpun harga minyak dunia naik lebih daripada itu. Sekiranya harga minyak dunia berada di bawah paras tersebut, harga mingguan petrol RON95 akan berada di bawah paras RM2.08.

Harga runcit RON95, RON97 dan diesel berdasarkan pengiraan *Automatic Price Mechanism* (APM) akan terus diumumkan secara mingguan.

Pengurangan paras harga runcit bagi produk petrol RON95 ini adalah selaras dengan komitmen Kerajaan Pakatan Harapan untuk mengurangkan kos sara hidup rakyat.

**Sayangi Malaysiaku!**

**Lim Guan Eng**  
**Menteri Kewangan**

Kementerian Kewangan Malaysia  
Putrajaya  
27 Februari 2019

**Like** Be the first of your friends to like this.

---